



20. Tschanteda da la suprastanza cumünela in marculli, ils 11.11.2015 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

1. Protocol
2. 0.205 Preventiv 2016
3. 0.211 Dumandas da fabrica
4. 8.300 Dragonhorse-holosana GmbH, concept da taxi cun charrozzas e chavals in Varusch, dumanda per contribuziun annuela in l'otezza da fr. 10'000.00
5. 8.300 Pista da schlisuler God God fin Griatschouls, decisiun da spordscher eir quist an la spüerta e surder incumbenza da fer pista
6. 8.300 Joos Curdin, dumanda per pudair spordscher tschainas da fondü sün l'alp Griatschouls
7. 2.130 Decisiun ulteriur agir Scoula da la Plaiv SFM
8. 0.130 Realisaziun management regiunel 2016 - 2023
9. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 28.10.2015 vain approvu unanimamaing.

149 0.205 Rendaquint/planisaziun da finanzas Preventiv 2016

La suprastanza fo üna lectüra dal preventiv 2016. Cun expensas da fr. 8'943'720.00 ed entredgias da fr. 8'864'785.00 serra il preventiv 2016 cun üna perdita da fr. 78'935.00. Previs es da fer amortisaziuns da la faculted administrativa in l'otezza da fr. 1'396'800.00. L'an chi vain es inavaunt previs da fer investiziuns brüttas in l'otezza da fr. 3'316'000.00 cun entredgias in fuorma da subvenziuns e contribuziuns d'arduond fr. 270'000.00. La suprastanza decida unanimamaing da suottametter il preventiv 2016 a la prosma radunanza cumünela cun la proposta d'accepter quel.

**150 0.211 Dumanda da fabrica
Holzer Peider, nouva garascha e nouv access d'üert**

La suprastanza piglia cugnuschentscha da la dumanda da fabrica da Peider Holzer per eriger üna nouva garascha ed ün nouv access i'l üert sün parcella nr. 640 in Davous Chesas. Zieva cuorta discussiun decida la suprastanza unanimamaing da conceder il permiss da fabrica giavüscho cun differentas pretaisas e cundiziuns.

**151 0.211 Dumanda da fabrica
Piz d'Esan GmbH, nouva tevla da reclama**

La Piz d'Esan GmbH ho inoltro üna dumanda da fabrica per munter üna nouva tevla da reclama per l'hotel e restaurant Veduta sün parcella nr. 399 a Cinuos-chel. La dumanda es gnida invieda a l'uffizi chantunel da construcziun bassa per l'approvaziun. Siand cha'l permiss da l'uffizi chantunel es uoss'avaunt maun, decida la suprastanza cun 4 cunter 0 vuschs da conceder il permiss giavüscho. Duri Campell s'ho absanto per quista tractanda.

**152 0.211 Dumanda da fabrica
Zavanelli Fiorina, refer fatscheda vers bunura e renover staunzas**

La suprastanza piglia cugnuschentscha da la dumanda da fabrica da Fiorina Zavanelli per refer la fatscheda vers bunura da la chesa i'l stedi dad aunz bundand 90 ans e renover las staunzas i'l talvo da la chesa sün parcella nr. 97 in Chauntaluf. Zieva animeda discussiun decida la suprastanza cun 4 cunter 1 vusch da conceder il permiss giavüscho.

**153 8.300 Turissem e cura
Dragonhorse-Holosana GmbH, concept da taxi cun charrozzas e chavals in Varusch, dumanda per contribuziun annuela in l'otezza da fr. 10'000.00**

La firma Dragonhorse-Holosana GmbH da Chapella ho inoltro üna dumanda per üna contribuziun finanzia pel nouv concept da taxi cun charrozzas e chavals in Varusch ill'otezza da fr. 10'000.00, fand differentas cundiziuns. Il concept prevezza, cha'l traiget cumainza la bunura tal camping Chapella e glivra darcho la saira in quel lö. Düraunt il di vain spüert il taxi cun chavals traunter Prasüras e Varusch. Las cundiziuns sun, cha la vschinauncha dess surder 1 fin 2 licenzas als vittürins interessos cun regulaziuns chi nu paun gnir executadas sainza üna ledscha correspudenta. Zieva animeda discussiun decida la suprastanza cun 4 cunter 0 vuschs da na conceder la contribuziun, siand cha sün las differentas cundiziuns fattas dal petent nu po la suprastanza pel mumaint entrer. Duri Campell s'ho absanto per quista tractanda.

**154 8.300 Turissem e cura
Pista da schlisuler God God fin Griatschouls, decisiun da spordscher eir quist an la spüerta e surder l'incumbenza da fer pista**

Vers la fin da la stagiun d'inviern passeda es gnida prepareda la via da God God vers Griatschouls scu pista per schlisuler scu prouva. Il rimbomb d'indigens e giasts d'eira per granda part fich positiv. L'unic chi s'ho stuvieu constater es, cha la via gniva transida suvenz da prümavaira bod cun Quads, que chi disturba considerabelmaing la sulvaschina. In quist connex renda la suprastanza attent, cha tenor uorden per fer adöver vias champestras, artichel 7, sun tuot las vias champestras e vias da god serredas sur inviern, e que il pü tard davent dals 20 december. Eir quist an es avaunt maun ün'offerta da Curdin Joos. La suprastanza decida unanimamaing da spordscher eir quist inviern la spüerta e da surder a Curdin Joos l'incumbenza da preparar la pista pel predscho offert da

fr. 160.00 per ura. Il scumand da transir cun veiculs resta in mincha cas in vigur, unic la maschina da fer pista ho il permiss da viager sül traget previs.

155 8.300 Turissem e cura
Joos Curdin, dumanda per pudair spordscher tschainas da fondü sün l'alp Griatschouls

In connex cun la pista da schlisuler ho Curdin Joos inoltro üna dumanda per pudair spordscher tschainas da fondü düraunt las sairas da glüna plaina sün l'alp Griatschouls. Zieva animeda discussiun decida la suprastanza unanimamaing da pussibilter a l'iniziant quista spüerta, però cha quel ho da pajer ün fit ill'otezza da fr. 50.00 per vouta e stu inoltrer üna dumanda separeda pel permiss d'ustaria limito.

156 2.130 Scoula Plaiv SFM
Decisiun ulteriur agir Scoula da la Plaiv SFM

In consequenza da la decisiun negativa da la radunanza cumünela da Zernez regard üna collavuraziun da la scoula dal s-chelin ot da Zernez cun la scoula da la Plaiv SFM es da decider l'agir futur per noss s-chelin ot. Ils presidents cumünels haun gieu üna tschanteda culs respunsabels dal Lyceum, quels füssan prontos da surpiglier eir la scoula da La Plaiv in üna fuorma pü pitschna. Zieva animeda discussiun decida la suprastanza cun 3 cunter 2 vuschs da perseguiter inavaunt la varianta cul Lyceum e fer las trattativas bsögnaivlas.

157 0.130 Collavuraziuns intercumünelas
Realisaziun management regiunel 2016 - 2023

Il management regiunel es ün'imsüra da la nouva politica regiunela da la Confederaziun, Cun quell'imsüra paun gnir sustgnidas vschinaunchas, regions e'l chantun cun üna promoziun dal svilup economic. Böt da la promoziun es, cha las regions vegnan u restan ablas da concorrenza, da sgürer plazzas da lavur existentas e s-chaffir novas, da crear valur e da contribuir uschè il svilup economic da noss chantun in sen positiv. Actuelmaing mainan las regions Mesolcina e Calanca, la regiun dal Parc Naziunel (Pro Engiadina Bassa/Cumün da Val Müstair), Surselva e Viamala scu eir las vschinaunchas Tavo e Clostra-Serneus e'l circol d'Engiadina Ota insembel cun la vschinauncha da la Bregaglia e la regiun Valposchiavo organisaziuns sün la basa da cunvegns da prestaziun cul chantun, üna piazza da lavur plaina. Las cunvegns da prestaziun actuelas in vigur scroudan la fin da l'an 2015. La nouva proposta da la cunvegna da prestaziun cumpiglia differents müdamaints per amegldrer la lavur strategica ed operativa. Impü ho decis la Regenza Grischuna da metter a disposiziun pels ans 2016 fin 2023 per quist intent 1,0 milliun francs l'an. A la regiun vain a cuostair la spüerta arduond fr. 66'500.00 l'an, tenor la nouva spartiziun da la regiun füss que per nossa vschinauncha 3% da l'import, arduond fr. 2'200.00 l'an. La suprastanza fo üna lectüra da la proposta da la cunvegna preschainta chi vain stipuleda per 4 ans e po gnir prolungida e decida unanimamaing da suottametter quella a la prosma radunanza cumünela cun la proposta d'accepter quella.

158 9.999 Varia

Il president infurmescha cha Michael Reinmann ho do aint la demischiun scu commember dal cussagl da scoula causa müdamaint da lö da domicil süls 31.12.2015. A la prosma radunanza es previs da fer propostas da candidats ed als 10 schner 2016 ho lö la tscherna substitutiva a l'urna.

Inavaunt infurmescha'l, cha'ls 15.01.2016 ho lö la tschaina da Nadel pel persunel e'ls uffiziants cumünels.

A las 22.10 vain la tschanteda alveda.

In buna fè

L'actuar:

D. Schwenninger